

**Naaja H. Nathanielsen
Attaviitsoq**

**UPA2016/67
9. maj 2016**

Nunatsinni erngup nukinga atorlugu pilersuinissamut kiisalu avammut niueruteqarnissamut periarfissat unammilligassallu erngup nukinganik nukissiuuteqarfiusuni piukkunnaatilinnilu Naalakkersuisut nalunaarusiornissamut peqquneqarnissaannik Inatsisartut aalajangiiffigisassaattut siunnersuut. Nalunaarusiami erngup nukinganik nukissiorfinnik pilersitsinissamut aningaasalersuinissaq kiisalu tamatumunnga periarfissat ilaatinneqassapput. Nalunaarusiaq kingsinnerpaamik inatsisartunut UKA2017-imi saqqummiunneqassaaq.

(Inatsisartunut ilaasortaq Anthon Frederiksen, Partii Naleraq)

Siunnersuut ingerlatiinnartumik akueraara ataatsimiititaliamilu suliarinissaanut innersuullugu. Naalakkersuisut akissutaannut taamaallaat oqaaseqaateqassaanga.

Naalakkersuisut allapput nukimmik brintinguilluni toqqorsinnaannissamik misissuiniarlutik. Ukiut arlallit matuma siorna Naalakkersuisut brintimik suliniut ukiuni pingasuni ingerlasoq unitsippaat, imminut akilersinnaannginnera pissutigalugu.

Nukissiorfimmi misilittakkat takutippaat, misileraatigineqartuni nukimmik annaasaqarneq angivallaartoq. Paasissutissat nutaat suut tunngaviuppat brinti aqqutigalugu nukimmik toqqorsinnaanissamut paasiniaaniaqqinnissamut?

Naalakkersuisut pilersaarutertik annertoq, ukiut arfineq pingasut ingerlaneranni nukissiornermik ataavartunik tunngavilinnik nunatta tamakkiisumik nukissiuuteqalernissaa attappaat. Naalakkersuisut nukissiornermut suliassaqarfimmut pilersaarut 2017-imi naamassissangatinneqarpoq, tassa aappaagu. Taamaalilluni ukiut arfineq marluk ingerlaneranni nunatsinni tamakkiisumik nukimmik mingutsitsinngitsumik imminut pilersornissarput periarfissaraarput. Naalakkersuisut nukissiornermut suliassaqarfimmut pilersaarut naamassitinnagu suliniutinik aallartitsissamaarpat? Aamma Naalakkersuisut missingersuuteqarpat anguniakkat naamassiniarneranni Landskarsimut qanoq naleqassanersoq?

Ataatsimiititaliaq sulilluaqqunarpoq.